



14. februar 2022

UPA 2022/172

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Ukiumoortumik akileraartarnermut allagartamut nassiussinermi ilanngussatut akileraarutit procentinngorlugit kommuneni Namminersorlutillu Oqartussat ataani susassa qarfinnut sorlernut tamakkiisumik aningaasartuutit procentinngorlugit takussutissaqalernissaat pillugu Naalakkersuisut peqquneqarnissaannut Inatsisartut aalajangiiffigisassaattut siunnersuut.

(Inatsisartunut ilaasorta q Aqqalu C. Jerimiassen, Atassut)

Tungavilersuut

Avannaata Kommuniani akileraarut 44%-iuvoq, aap, tamanna nalunngilara, tassungali killippoq, peqqutigalugu kingorna naluittaratsigu akileraarutitta sumut ingerlaneri. Uanga nammineq akileraartartutut takusinnaarusuppara akileraarutimma sumut siunnerfilimmik ator neqarneri, ajornangippallaaqaarmi maanna inissisimaneq oqaannartarluni "ima annertutigisumik ukioq manna akileraarsimavutit", nalulluinnarluguli taakku sumut ingerlasimanersut.

Inuup kialluunniit paasisinnaasariaqarpaa aningaasarsiami akileraarutai sumut ator neqartarnerisut. Takusinnaarususuppara ukiup naanerani akileraarutigisimasanni akileraarutima Peqqinnissaqarfimmut, Atuarfeqarfimmut, Inunnik isumaginninnermut, inuussutissarsiutinik siuarsaanermut, sanaartornermut il.il qanoq annertutigisut ator neqarsimaneri.

Isumaqarpugummi inuup akileraarutini annerusumik sumut ator neqartarnerisut paasisimasaqarfigilerunigit piumasutsimut sulerususutsimullu qaffassaaqataasinnaasoq, inuiaqatigiinnilu oqallinnermi isummorsinnaanerulissasoq. Naatsumik oqaatigalugu, qanoq pilliuteqartiginerput sumullu atorsimanersut paasisariaqarparput.

Politikkerit tatigiinnarsinnaavagut aningaasaativut qanoq atussaneraat. Immaqaluunniit takussutissanngumik paasinartumik piunasaqarsinnaavagut. Finanslov akileraartartuniit atuarujoorneqarneq ajormat, takorloorparput naatsumik quppernerup ataatsip iluani susassa qarfinnut annerusunut procentinngorlugu aningaasat qanoq agguataarneqarsimanersut takussutaalissasoq.

Aningaasatigut ingerlatsinikkullu pisortanut kingunerisassai:

Una siunnersuut Inatsisartut UPA2020-mi ataatsimiinnissaannut oqaluuserisassanngortinneqarnikuugaluarpoq immikkoortoq 77-tut. Naalakkersuisullu akissuteqaatiminni suut aningaasartuutissatut ilanngunneqartariaqartutut taputaqarput. Naalakkersuisut allapput:



”Akerlianilli siunnersuut naqiterinermut nassiussuinernullu aningaasartuuteqarnerulersitsissaaq. Tamanna allakkanik qarasaasiakkut allakkerivikkullu nassiussuinermi assigiimmik sunniuteqassaaq. Nassiussuinermit aningaasartuuteqarneruneq innuttaasumut ataatsimut agguaqatigiissillugu 5 koruunit angullugit annertussuseqalersinnaavoq. Taassumalu saniatigut paasissutissanik suliaqarnermut, taakkulu paasiuminartunngorsarnerannut nukinnik atugassanngortitsisoqassaaq. Siunnersuummut ukiumoortumik aningaasartuutit 350.000 koruunit missaannik annertussuseqassasut Naalakkersuisut missingerpaat, tamannalu ukiuni sisamani aningaasanut inatsisiliornermi 1,3 mio. koruuninik naleqassaaq. Aningaasartuutit taakku Akileraartarnermut Aqutsisoqarfimmit aningaasartuutigineqartariaqassapput, tassanilu maanna siunertamut matussusiissutissanik aningaasaliissuteqanngilaq.”¹

Qulequtaasumi ersersinneqarpoq paasissutissat pisariaqarsinnaasut kommunet Namminersorlutillu Oqartussat missingersuutaanniit ujartorneqartassasut. Qulequtaasumilu kissaatigineqarpoq taakku paasissutissat tabelitut ilusilerlugit saqqummiunneqartassasut paasinartumik. Qarasaasiakkut sytsemit tulluarsarneqarnissaat pisariaqartussaassaaq. Taamatut allannguinnessamut suliaassartaa nalilernerqarpoq AC Fuldmægtigep ukiup ataatsimik siviutigisumik suliarineqassasoq, imaapporlu aningaasartuutissat 1 mio. kr. Aningaasartuutillu kommunet peqatigalugit agguarlugu akilernerqassasoq.

Namminersortunut aningaasarsiornikkut allaffissornikkullu kingunerisassai:

Soqanngilaq.

Innuttaasunut aningaasarsiornikkut allaffissornikkullu kingunerisassai:

Soqanngilaq.

¹ Siullermeerinninnermi akissuteqaat UKA2020/77